

30/01/2004

GP Joran naik taraf

KUALA LUMPUR: Penyenaraian Pertandingan Memancing GP Joran anjuran Berita Harian sebagai 10 Acara Sukan Pelancongan Terbaik 2003 daripada Majlis Sukan Pelancongan Malaysia (MSPM), baru-baru ini, bukan saja menaikkan imej pertandingan itu di mata masyarakat malah sekali gus memartabatkan sukan memancing sebagai satu daripada sukan riadah popular masa kini.

Anugerah itu dianjurkan MSPM dengan kerjasama Kementerian Kebudayaan, Kesenian dan Pelancongan serta Kementerian Belia dan Sukan, bertujuan memartabatkan industri sukan pelancongan dan memberi pengiktirafan kepada penganjurnya.

Pengarang Joran/Projek Berita Harian, Kamal Ahmad, menerima anugerah itu daripada Ketua Setiausaha Kementerian Belia dan Sukan, Datuk Talaat Husain, yang mewakili Menteri Belia dan Sukan, Datuk Hishammuddin Hussein. Turut hadir, Pengerusi Jawatankuasa Pelancongan, Sains dan Teknologi dan Pembangunan Organisasi Selangor, Datuk Ir Lum Weng Keong dan Presiden Majlis Sukan Pelancongan Malaysia, Ahmad Kamil Mohamed.

Sebanyak 20 acara sukan pelancongan terpilih menerima anugerah itu.

Kamal berkata anugerah itu adalah pengiktirafan tertinggi kepada Berita Harian khususnya anggota Team Joran yang bertungkus-lumus menganjurkan GP Joran sejak 1997.

"Pengiktirafan ini akan menaikkan lagi semangat kami untuk menjayakan lebih banyak pertandingan memancing selepas ini termasuk siri pertandingan bertaraf antarabangsa di perairan Langkawi dan Thailand.

"Semua ini hasil kerjasama kerajaan negeri yang menjadi tuan rumah dan agensinya di peringkat daerah selain keupayaan Team Joran yang melaksanakan acara ini secara profesional, bersungguh-sungguh serta sokongan pemancing sendiri.

"GP Joran berjaya meletakkan sukan memancing di negara ini pada status lebih berprestij dan popular selain memberi impak kepada sosio ekonomi," katanya.

Lebih membanggakan, GP Joran diletakkan sama taraf dengan tiga sukan berprestij yang mendapat liputan seluruh dunia seperti Telekom Malaysia Le Tour de Langkawi yang dianjurkan First Cartel Sdn Bhd; Formula 1 Powerboat World Championship Malaysian Grand Prix 2003 (H2O Sports Sdn Bhd) dan Petronas Malaysian Grand Prix anjuran Sepang International Circuit Sdn Bhd.

Enam lagi acara yang menduduki 10 acara terbaik ialah Penang International Bridge Run anjuran The New Straits Times Press (M) Bhd; Desaru International Long Distance Triathlon (Desaru Development Corporation Sdn Bhd); Mount Kinabalu International Climbathon (Sabah Tourism Board); Ironman Langkawi Malaysia Triathlon (Liem Sdn Bhd); Rainforest Challenge (Motorsports Adventure Sdn Bhd) dan Raja Muda International Regatta, dianjurkan Royal Selangor Yacht Club.

Pada majlis sama, MSPM turut menyerahkan tiga anugerah khas iaitu Anugerah Pencapaian Presiden kepada Tun Dr Mahathir Mohamad, kerana sumbangan beliau memajukan negara ketika menjadi Perdana Menteri selama 22 tahun.

Datuk Bandar Kuala Lumpur pula menerima anugerah Bandaraya Sukan Pelancongan Bertaraf Dunia 2003 manakala Menteri Besar Selangor menerima anugerah Negeri Sukan Pelancongan Malaysia 2003.